



Pretresi su vršeni na više lokacija

## Uhapšen narkobos Milan Matković

Matković je uhapšen u blizini Trebinja, gdje se skrivao posljednjih godina

Pripadnici **SIPA** u petak su uhapsili pet osoba na području Trebinja, gdje su na više lokacija vršili pretresi stambenih objekata i pokretnih stvari zbog sumnje na trgovinu drogom, oružjem i vojnom opremom.

Sumnja se i na krivično djelo pripremanje krivičnog djela u vezi sa krivičnim djelom ubistvo i krivično djelo falsifikovanje isprave.

Portal Istraga.ba javio je da je uhapšen Milan Matković jedan od najtraženijih narkodilera sa Balkana. Matković je uhapšen u blizini Trebinja, gdje se skrivao posljednjih godina. Uz njega je bio Vladica Rakić, koji je također uhapšen.

Matković je uhapšen po nalogu Tužilaštva BiH i to zbog trgovine narkoticima. Njegove su poruke pronađene u aplikacijama Sky i Anom. Kriptovane poruke su

brojnim policijskim agencijama u svijetu potvrdile ranije sumnje da je Matković jedan od najvećih narkobosova na Balkanu. Srbijski mediji su, pozivajući se na policijske izvore, objavljivali da je Matković preuzeo poslove Darka Šarića.

Za Matkovićem je austrijsko pravosuđe raspisalo crvenu potjernicu. Osumnjičen je za trgovinu kokainom. Prvi put je u javnost dospio zbog trostrukog ubistva u Srbiji.

Iz **SIPA** su istakli da su slobode lišene osobe sprovedene u službene prostorije radi kriminalističke obrade i ispitivanja u svojstvu osumnjičenog.

Aktivnosti su provedene po nalogu Suda BiH i pod nadzorom Tužilaštva BiH, u saradnji sa Obavještajno-sigurnosnom agencijom Bosne i Hercegovine i MUP-om Republike Srpske.